



15. februar 2019

UPA 2019/59

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

**Meeqqat atuarfiani digitalimut piorsaanerup taamatullu digitalimik atuinerup immikkut ilinniartitsissutigineqartalernissaat anguniarlugu inatsisissamut siunnersuummik saqqummiusseqqullugit Naalackersuisut peqquneqarnissaannik Inatsisartut aalajangiiffigisassaattut siunnersuut. Suliamut tassunga atatillugu Naalackersuisut attavigissavaat Institut for Læring aamma kommunit siunertaralugu UV-mut atortunik naapertuuttunik ineriartortitsinissaq aamma ilinniartitsisutut ilinniagaqareersut ilinniaqqissinnaanissaat.**

(Inatsisartunut ilaasortaq Randi Vestergaard Evaldsen, Demokraatit)

Qularutigineqassanngilaq nunarsuaq digitalinngornikummat. Tigussaasut amerlialuttuinnarput qarasaasiamut nuunneqarnikuupput. Internet atorlugit niuerniartarpugut pisiniarfiit pisiniarfiginagit. Internetikkut aningaaseriviliartarpugut. Nakorsaatinik internetikkut pisiniartarpugut. Digitalikkut ikinngutigut attavigisarpagut, digitalikkut ikinngutitaartarpugut aamma ilisarismaneruleriartortarpugut. Aamma sorpassuit allat taagorsinnaagaluarpakka digitalimik iliuuserisartakkagut. Siunissamulli ajoraluartumik siulittuisinnaanngilanga, kisianni qularutissaagunangilaq inuiaqatigiit digitalisererneqarnerat sukkaoorujussuarmik ingerlajumaarmat. Taamaattumik piareersartariaqarpugut aamma minnerunngitsumik meerartagut piareersarluartariaqarpagut..

Demokraatini tapersorsorparput ” Inuiaqatigiit digitaliusut Nuna tamakkerlugu digitaliseeriinermut periusissiaq 2018-2021”, 2018-mi saqqummersinneqartoq aamma isumaqarpugut oqaatsit kusanartorsuit piviusunngortinneqartariaqartut. Atagu pilersaarutip aallarniutaa issuaaffigilaariarlara:

*"Digitalikkut piorsarneq siusissukkat aallartittarpoq. Toqqammavinnik isumannaatsunik pilersitsinikkut meerartagut inuusuttortagullu digitalimi toqqissisimasumik atugaqartitaanissaat akisussaaffigaarput. Angajoqqaatut tamatta digitalikkut piorsarnissamut, meeqqat atuarfiata suliaqarfigeqqinnissaanut akisussaaffigisaanik toqqammavissamik meerartatsinnut tunniussaqaarnissamut akisussaaffeqarpugut, tamattalu digitalimi – cyberspacemi – isumannaatsumik atugaqarnerup ilinniarnissaa akisussaaffigaarput."*

Aamma pilersaarut atuarlugu ingerlaqqikkutta uku atuarneqarsinnaapput:

*"Meeqqat atuarfiata atuartut digitalikkut piorsassavai, inuunerminni nassatassaannik. Digitaliseeriinermut atatillugu kulturi peqqinnartoq pilersinneqassaaq aamma digitalimi periarfissiissutaasut."*<sup>1</sup>

<sup>1</sup> <https://digitalimik.gl/~media/Digitaliseringsstyrelsen/Materiale%202018/Digitaliseringsstrategi%20DK%20web.pdf>



Kiisalu pilersaarutip anguniagassartaani 3.d.-mi ima allassimasoqarpoq.

*"Atuartut tamarmik isumannaatsumik atuartinneqar - tassapput aamma internettimik inuillu attaveqaataanni atuinermi pissusissamisoortumik ingerlasassallutik."*<sup>2</sup>

Demokraatini ajunngitsutut isumaqarfigaarput qulequtaq sammineqarluarmat, taamaakkaluartorli isumaqarpugut naammangitsoq taamaallaat IT fagini pioreersuni atuartitsisutinilu allani pioreersuni, atuartitsissutigineqartassappat, soorlumi ullumikkut taamaattoq. Isumaqarpugut immikkoortoq ima imartutigisooq - sualummik siunissaq eqqarsaatigalugu - allaat atuarfinni klassini assigiinngitsuni fagitut immikkut atuartitsissutigineqartalertariaqartoq. Takorloorparput fagi siammasissumik sammineqartassasoq pingaarnertut imarissallugit digitalimik pissusilersortarneq, digitalimi ulorianarsinnaasut aamma teknikkimut tunnganerusut digitalimut tunngasut soorlu programmeeriinissaq aamma paasiuminaallisaasarnissat. Nalunngilarput Naalakkersuisut ilinniartitaanerup iluarsartuunnissaa aallartinnikuugaat aamma isumaqarpugut siunnersuut manna suliamut tassunga ilanngullugu suliarineqarsinnaalluortoq. § 37 naapertorlugu apeqquinnut 72/2019-mut akillutik Naalakkersuisut allapput 2018-p aallartimalernerani projektgruppimik pilersitsisoqarsimasooq, suliarissallugu meeqqat atuarkianni atuaqqiffinnilu digitalimut tunngasut. Tassunga atatillugu ilanngullugu oqaatigineqarpoq suleqatigiisitap sulinermini isummat "Inuiaqatigiit digitaliusut Nuna tamakkerlugu digitaliseeriinermut periusissiaq 2018-2021"-miittut tunngavigigaat."<sup>3</sup>

§ 37 naapertorlugu apeqqummut 72/2019-mut akillutik Naalakkersuisut ima allapput:

*"Meeqqat atuarfiat pillugu inatsisip aamma meeqqat atuarfiani ilinniagassanut pilersaarutit siunissami nutarternissaat tikippallaartinnagu naapertuutissaaq Ilinniartitaanermut Styrelsi aamma Institut for Læring digitalimik piorsaaneq aamma atuineq taamatullu teknologimik paasinnittaaseq oqaloqatigiissutigilertuuppatigit, tassunga ilanngullugu misissorlugit meeqqat atuarfiani aamma ilinniartitsisunngorniarfimi immikkut fagiliorinissamat qanoq periarfissaqarnerooq aamma tunngavilersuutit suut atorineqarsinnaanersut."*<sup>4</sup>

Demokraatinut pingaartorujussuuvoq suliniutip kommuninut atuartitsisunullu naalakkiutigineqannginnissaa. Taamaattumik siunnersuutigaarput kommunit kiisalu Ilisimatusarfimi Institut for Læring piareersaataasumik sulinermut akuliunneqarnissaat, inernerit pitsaanerpaat taamaaliornikkut pissarsiarineqarsinnaassammata. Suliamut tunngatillugu pingaaruteqarpoq aamma eqqarsaatigissallugu meeqqat atuarfiini ilinniartitsisut qanoq iliorlutik immikkoortumi piginnaasatik qaffassarsinnaassaneraat fagimi kissaatigineqartumi allaat atuartitsisinnaanngortillugit.

Paasivara atuartitsissutit naleqquttut pisiarineqareersimasut taakkulu kalaallisuunngortillugit aallartinneqarsimasut. Tamanna nuannerpoq takutinneqarmat immikkut fagiliorinissap tungaanut iluamik

<sup>2</sup> <https://digitalimik.gl/~media/Digitaliseringsstyrelsen/Materiale%202018/Digitaliseringsstrategi%20DK%20web.pdf>

<sup>3</sup> Svar på § 37 spørgsmål 72/2019

<sup>4</sup> Svar på § 37 spørgsmål 72/2019



ingerlasoqartoq.

Neriuppunga Naalakkersuisut siunnersuutiga ilalerumaaraat taamatullu Inatsartuni partiit allat.

**Aningaasarsiornikkut allaffissornikkullu namminersorlutik inuutissarsiortunut kingunissai.**

Siunnersuutip ineriartortinneqarnerata aningaasartuutitaqarnissaa naatsorsuutigineqassaaq. § 37 naapertorlugu apeqqummut 72/2019-mut Naalakkersuisut akissuteqarnerminni imatut paasissutissiipput:

” Digitalimik piorsaaneq atuinerlu pillugit ilinniartitsinermut atugassanik sananeq eqqarsaatigalugu ilinniartitaanermut Aqutsisoqarfiup aamma Institut for Læringip suleqatigiinnerannut atatillugu aningaasaqarneq piffissamillu atuneq naatsorsorneqarnikuunngillat.”<sup>5</sup>

Tunngavissaqanngilaq Naalakkersuisut saqqummiussaannik allaanerusunik saqqummiussinissannut, taamaakkaluartorli oqaatigisinnaavara 2019-mut Aningaasanut Inatsimmi Konto pingaarnermut 40.98.02-mut aningaasaliisoqarnikummat 2019-mi ukiunilu missingersersuusiorfiusuni nuna tamakkerlugu digitaliserinermut periusissap piviusunngortinnissaanut. Demokraatini pissusissamísoortutut isigaarput kontomi tassaniittut aningaasat aamma atorneqassasut matuma siunnersuutip ineriartortinneqarnissaanut kiisalu tamatumap Meeqqat Atuarfiani piviusunngortinnissaanut. Tamatuma saniatigut ilinniartitaanermut iluarsartuussinissamut aningaasaliisoqarnikuuvoq, aamma tamatumap suliarineranut manna siunnersuut aamma ilanngunneqarsinnaalluarpoq.

Siunnersuut manna akuerineqassappat, fagip ineriartortinnerata ilinniaqqittarnissallu saniatigut, pisariaqalissaaq meeqqat atuarfiat pillugu inatsisip atuuttup allannngortinnissaa, inatsimmi ullumikkut atuuttumi aalajangersarneqarnikummat, fagit suut trinini assigiinngitsut ilinniartitsissutigineqartassanersut. Matumani pineqarmat fagi nutaarluinnaq kiisalu ullumimuut naleqqiullugu IKT-mik atuinerup allannngortinnissaa, taggipparput inatsimmik piareersaanermut atatillugu ilinniagartuup ataatsip ukiup ataatsip missaa atortariaqassagaa, tassa 500.000 koruunit. Taassuma iluaneereerput fagimi ilinniarnermut pilersaarutit sananeqarnissaat.

Naalakkersuisut ilinniartitaanerup iluarsartuunneranut atatillugu suliniutip ilanngunneqarnissaanut kaammattuut Naalakkersuisut malissagaluarpassuk, taava naatsorsuutigisariaqassaaq Suleqatigiisitap pioreersut allannghortinnissaat imaluunniit nutaanik suleqatigiisitamik pilersitsisoqarnissaa. Tamanna pissutaalluni iluarsartuussinermut suliaq sivitsorneqassanersoq Naalakkersuisut namminneq aalajangissavaat.

**Aningaasarsiornikkut allaffissornikkullu namminersorlutik inuutissarsiortunut kingunissai.**

Soqanngilaq.

**Aningaasatigut allaffissornikkullu innuttaasunut kingunissai.**

Soqanngilaq

---

<sup>5</sup> Svar på § 37 spørgsmål 72/2019